

अरे क्यु नैणा भरमावे,  
थारे हाथ कबीरो नही आवे ॥

अमर लोक से आई अपसरा,  
गल मोतीयन की माला ओ,  
नाच कूद ने तान बतावे,  
कबीर का रूप हरतारा ओ,  
अरे क्यु नैणा भरमावें,  
थारे हाथ कबीरो नही आवे ॥

जोगी मोया जती मोया,  
शंकर नेजा धारी ओ,  
पहाड़ो रा अवधूत मोया,  
अबके कबीर थारी वारी,  
अरे क्यु नैणा भरमावें,  
थारे हाथ कबीरो नही आवे ॥

रूपो पेर रूप दिखावे,  
सोनो पेर रिझावे जी,  
नाच कूद ने तान बतावे,  
तोइ कबीर ना रिझावे,  
अरे क्यु नैणा भरमावें,  
थारे हाथ कबीरो नही आवे ॥

ईन्दर बरये धरती भीगे,  
पत्थर रो कई भीगे ओ,  
मत कर सुरता आटक झाटक,  
तोई कबीर ना रिझावे,  
अरे क्यु नैणा भरमावें,  
थारे हाथ कबीरो नही आवे ॥

जात जलावो नाम कबीरो,  
हे काशी रो वासी जी,  
मारे मन मे एड़ी आवे,  
एक माता दूजी मासी जी,  
अरे क्यु नैणा भरमावें,  
थारे हाथ कबीरो नही आवे ॥

पांच इन्द्रियां वश मे किनी,  
बांधी काचे धागे जी,  
रामानन्द रा भणे कबीरा,  
सूती सुरता जागी जी,  
अरे क्यु नैणा भरमावें,  
थारे हाथ कबीरो नही आवे ॥

अरे क्यु नैणा भरमावे,  
थारे हाथ कबीरो नही आवे ॥

स्वर प्रकाश माली  
प्रेषक पुखराज पटेल बांटा  
9784417723

Source: <https://www.bharattemples.com/thare-hath-kabir-nahi-aave-ji/>



# Bharat Temples

Complete Bhajans Collections - Download Free Android App

<https://play.google.com/store/apps/details?id=com.numetive.bhajans>

Facebook: <https://www.facebook.com/bharattemples/>

Telegram: <https://t.me/bharattemples>

Youtube: <https://www.youtube.com/channel/UC24oJCxZJyhhKzSUD-Lt9Tw>